

ጳውሎሲ ኤፌሶን አሳሰ ጳፊዳ ኪታ ጊዶ ቆፋ

ጳውሎሲ ኤፌሶን አሳሰ ጳፊዳ ኪታይ ሃራፔካ ካሴቲዲ ኢዚ ሎኤሉ ያሊዛይ፥ «ጸሓ ሽኔይ ፖሌታናይ ሳሎኒኔ ሳኣን ዲዛ ማዴቲፋቲ ወሪካ ኢሲፌ ኢሲ ኪርሰቶሳ ጎዳቲፋ ጋርሰ ኣጂዛ ዎዴይ ጋኪሺና» (1:10) ጊዛ ቆፋ ቦላ። ቃሴካ ጎዳ ዬሱስ ኪርሰቶሳ ኢሲፌቲፋን ኣሳ ዜሬሉ ወሪካ ኢሲኖ ጊዳና ማላ ሃይሳ ጊታ ቆፋ ኦሶን ፔይሻና ማላ ጸሓ ዴሬዛ ቆፍሲዛዛ።

ኤፌሶን ኪታን ኮይሮ ኪፊሌዛ ጳፊዚ ኢሲፌቲፋ ጊሻሰ ዴሚዲ ኣይፌ ዮኦዛ ኣሲዲ ጸሓ ኣዋይ ዴሬዛ ዎስቲ ዶሪዳኮ፥ ባ ናዛ ዬሱስ ኪርሰቶሳ ባጋራ ኢስቲ ባ ናጋራፔ ማርቲል ዴሚዲ ዋኒ ኣቲዳኮኔ ጸሓ ጊታ ሂደታ ቃላይ ጸሎ ኣያና ባጋራ ዋኒ ቆንጪዳኮ ኤሪሴሰ፤ ናምኣንፉ ኪፊሌዛን ቃሴ ጳፊዚ ናባቢዛይቲ ኢሲፌቲፋ ዴኦን ኪርሰቶሳን ኢስታሰ ዲዛ ኢሲፌቲፋይ ቱሙ ጊዳና ማላ ኢስቲ ዋኒ ዋኒ ዴኣናኮ ኢስታ ቆፍሴሰ።

ኣሳይ ኪርሰቶሳን ዲዛ ኢሲፌቲፋን ኣይ ማላ ኢሲፌቲፋ ኢስታሰ ዲዛኮ ዴማ ዴማ ሃሳያ ቆሞታን ቆንጪዴሰ፤ ዎሳ ኬሉ ኪርሰቶሳ ኣሳቲል ጊዲሺን ኪርሰቶሲ ቃሴ ኣሳቲላሰ ሁኤ ማላ። ዎሳ ኬላያ ጊምቤ ኬላ ማላ ጊዲሺን ኪርሰቶሲ ቃሴ ኬላሰ ጉላን ኡቲዛ ሹቻ ማላ፤ ዎሳ ኬሊያ ማቹ ማላ ጊዲሺን ኪርሰቶሲ ቃሴ ኣዚና ማላ፤ ጳፊዚ ኪርሰቶሳ ባጋራ ቆንጪዳ ጸሓ ኪያቲፋ ኬሂ ጶቂሲ ዮቲዛ ዎዴ ጨማቲሉ ዲዛ ቃላን ዮቲሰ። ኡባ ሚሼካ ኢዚ ጸሊዛይ ኪርሰቶሳ ሲቆን፥ ኢዛ ያርሼቲፋን፥ ኢዛ ማርቲፋን፥ ኢዛ ኪያቲፋኒኔ ኢዛ ሳርቲፋ ባጋራኮ!

ሃ ማጸፋይ ኦይኪዳ ኩሚፋ ቆፋ

ጌሎሶ 1:1-2

ኪርሰቶሳኔ ዎሳ ኬሉ 1:3—3:21

ኪርሰቶሳን ጊዲዳ ኦራፋ ዴኦ 4:1—6:20

ኩሻ ቆፋ 6:21-24

¹ ጸሓ ሽኔ ማላ ዬሱስ ኪርሰቶሳ ሃዋሬ ጊዲዳ ጳውሎሳፔ፥ ዬሱስ ኪርሰቶሳን ዲዛ ኣማኔቲዛይታሰ ኤፌሶንን ኣማኒዛ ኣሳሰ።

² ኑ አዋ ጸሳፌኔ ጎዳ ዩሱስ ኪርስቶስ ሲያቴሉኔ ሳሮቴሉ ኢንቴስ ጊዶ።

ኪርስቶስ ሴቲዛ አያና አንጆ

³ ኑ ጎዳ ዩሱስ ኪርስቶስ ባጋራ ሳሎን አያና አንጆ ኡባን ኑና አንጂዳ ጎዳ ዩሱስ ኪርስቶስ አዋይ ጸሲ አንጄቶ።

⁴ ኑ ኢዛ ሲንፋን ጌሽኔ ዋሶይ ባይንዳይታ ጊዳና ማላ ቡሮ አላሜይ ሜዴታናፕ ካሴ ባ ሲቆን ኪርስቶስ ባጋራ ኑና ዶሪደስ።

⁵ ዩሱስ ኪርስቶስ ባጋራ ኑ ኢዛ ና ጊዳና ማላ ባ ሎኑ ቆፋን ኮይሮ ኡባ ዋሊደስ።

⁶ ሄሲካ ባ ዶሲዛዴ ባጋራ ጮ ሜላ ኑስ ኢሜቲዳ ቦንቾ ኪያቴሉ ጋላቲታና ማላሳ።

⁷ ጸሳ አጼ ኪያቴላ ዱሬቴላፌ ዴንዶይሳን ዩሱሳ ሱፋን ዋዜቲዲ ናጋራፕ ኑ ማሬቲዶስ።

⁸ ኢዚ ባ ኪያቴላ፥ ሂላቴላኒኔ ኤራቴላ ኡባን ኑ ቦላ ኬሂ ዳርሲደስ።

⁹ ጸሲ ቆፒዳ ባ ጹራ ቆፋ ኪርስቶስ ባጋራ ባ ሎኑ ቆፋ ማላ ኑና ኤሪሲደስ።

¹⁰ ቡሮፕ ዋዴ ዉርሴፋን ሃናናስ ዲዛ ኢዛ ቆፋይ ሳሎ ቦላኔ ቢታ ቦላ ዲዛይታስ ኡባስ ሁኤ ጊዲዳ ዩሱስ ኪርስቶስ ኡባ ጋርስ አላናሳ።

¹¹ ዉርሲካ ባ ሸኔ ማላ አሊዛ ኢዛ ሸኔን ኮይሮካ ኢዚ ቆፒ ዋሊዳይቲ ኑኒ ኢዛን ዶሬቲዶስ።

¹² ኑኒ ካሴቲዲ ኪርስቶስ ባጋራ ኤካና ጊዲ ኡፋይሳን ናጊዛይቲ ጸሳ ቦንቾ ጋላታን ቆንጨሳናሳ።

¹³ ኢንቴካ ቃሴ ቱማ ቃላ ሄሲካ ኢንቴና አሺዛ ሚሺራቾ ቃላ ሲዬዲ ኪርስቶስን አማኒዴታ፤ ኢዛ አማኒዲ ካሴ ኢሜታና ጌቴቲዳ ጸሎ አያና ማታሚን አታሚቲዴታ።

¹⁴ ሄ አያናዚካ ኢዛ ቦንቾ ጋላታን ቆንጨሳና ማላ ጸሲ ባስ ጊዲዳይታ ኡባታ ዋዛና ጋካናስ ኑ ላታስ ኦይሶ።

ጋላታኔ ዋሳ

¹⁵⁻¹⁶ ሄሳ ጊሻስ ኢንቴ ጎዳ ዩሱሳ አማኒዳ ጊሻሲኔ አማኒዛ አሳ ኢንቴ ሲቁዛይሳ ታ ሲዮሶፕ ሃ ሲሚን ኢንቴና ቆፓ ቆፓ ኤካዳ ታኒ ታ ዋሳን ኢንቴ ጊሻስ ጸሳስ ጋላታ ሺሾ አጋቤኬ።

17 ቦንቸ አዋ ጊዲዳ ኑ ጎዳ ዩሱስ ኪርስቶስ አዋ ጸሳ ኢንቴ ሎኤሊ ኤራና ማላ ቆንጨሲዛ ኣያናይኔ ኤራቴላ ኣያናይ ኢንቴስ ኢማታና ማላ ታ ኢንቴስ ፓጩይ ባይንዳ ዋሳይስ።

18 ሄሳሉካ ኢንቴ ኢዛን ጸይጌቲዳ ኡፋይሳይ ሄሲካ ኣማኒዛይታ ኣቻን ዲዛ ኢዛ ዱሬቴሊ ኣዛኮኔ ኢንቴ ኤራና ማላ ኢንቴ ዋዚና ኣይፌይ ፖኣና ማላ ዋሳይስ።

19-20 ኑስ ኣማኒዛይታስ ኡባፌ ቦላ ጊዲዳ ኢዛ ዋልቃ ቋቃቴስ ኢንቴ ኤራና ማላ ታ ዋሳይስ፤ ሄ ዋልቃይካ ኢዛ ጌታ ሚኖቴላ ኦሶን ቤሲዳይሲ ሃይቆፔ ኪርስቶስ ዴንሊዲ ሳሎን ባ ኡቫቻን ኡቲሲዳ ኪርስቶስ ባጋራ።

21 ኣይሲዛይታ፣ ጎዳቴላፌ፣ ዋልቃፌኔ ካዋቴላፌ ቃሴካ ሃኢ ጸላ ጊደንታ ቡርፔ ያና ዋዴካ ጊዲን ሱንሐ ኡባፌ ኢዚ ቦላ።

22 ጸሲ ሃራ ወርሲ ኢዛ ቶሆፔ ጋርሳን ሃሪሲዴስ፤ ዋሳ ኬላንካ ኡባ ቦላ ሁኤ ኦሊዴስ።

23 ዋሳ ኬሊያ ኪርስቶስ ኣሳቴላ፤ ሄ ኢዛካ ኡባሶን ኡባ ሚሽ ኩንሊዛ ሄ ኢዛ ኩማላ።

2

ኪርስቶስ ዴንላ

1 ኢንቴ ቆሂዳ ቆሆ ጊሻሲኔ ኢንቴ ናጋራ ጋሶን ኢንቴ ሃይቂዳታ ሺን፤

2 ሄሳ ኢንቴ ሃይሳ ኣላማዛ ኢታ ኦጌ ካሊዴታ፤ ቦላ ጫርኮ ቦላ ዲዲ ሃሪዛ ዋልቃማ ኣያናታስ ሃኢካ ጸሳስ ኣዛዜቶንታ ኣሳ ቦላ ኦሊዛ ኢታ ኣያናስ ኢንቴ ኣዛዜቲሼ ጋምኢዴታ።

3 ሃይሳፌ ካሴ ኑኒ ኑ ኣሾ ኣሞቴሐ ፖሊሼ ኣሾይ ኮይዛ ኦጌ ካሊሼ ኢስታራ ዶስ፤ ኑኒካ ሃንኮ ኣሳ ማላ ኑ ሜዴቴላፌ ጸሳ ሃንቆ ጋርሳን ዴኦስ።

4-5 ጊዶ ኣቲን ጸሲ ኬሂ ሲቂዳ ጊሻስ ባ ማር ዳሮን ኑኒ ኑ ቆሆ ዳርቴላን ሃይቂዳይታ ጊዲ ዲሺን ኪርስቶስ ባጋራ ኑና ኣሺዴስ፤ ኢንቴ ፓጺዳይ ኢዛ ኪያቴላና።

6 ጸሲ ኑና ኪርስቶሳራ ጋሊ ዴንሊዴስ፤ ዩሱስ ኪርስቶስ ባጋራ ኑና ሳሎን ባናራ ኡቲሲዴስ።

7 ሄሲካ ሃይሳፌ ጉዬ ያና ዋዴዛን ዩሱስ ኪርስቶሲ ኑስ ባ ኪያቴላን ቆንጨሲዳ ዛዋይ ባይንዳ ባ ኪያቴላ ዱሬቴላ ኑና ቤሳናሳ።

8 እንገንጽ ጸሐፊ ከያታልን አማኝን አቲዳታ፤ ሄሲካ ጸሐፊ እንገንጽ ማላ ጮ አሚዳዛፔ አቲን እንገንጽ ኦሶፔ ጊዳና።

9 ኦሲካ ጮቁቶንታ ማላ ኦሶፔ ጊዳና።

10 ሄሲካ ጸሐፊ ካሴ ኮይሮ ገግሲ ዋሊዳ ሎኦ ኦሶ ኦሲ ኦላና ማላ ዬሱስ ከርሰቶሳ ባጋራ ኦሲ ናምኣንሉ ማጴቲዳይታኔ ጸሐፊ ማጴቲዳታ።

ከርሰቶሳን ቤተዛ ኢሲፊቴል

11 ሄሳ ገሻስ እንገንጽ ካሴ እንገንጽ ዬላቴላን አይዛቤቲ እንገንጽ አሳቴላ ቦላ አሳ ኩሼ ኦሶ ጋሶን፡ «ኦሲ ቃጸሬቲደስ» ጊዛ አሳቲ እንገንጽ፡ «ቃጸሬቶንታይታ» ጊዛይቶ! እንገንጽ ሄሳ ኦኔ ዋዚናን ዋሊቴ።

12 እንገንጽ ሄ ዋዴ ከርሰቶሳፔ ሻኬቲዲ፡ ኢሰራኤሌ ናይታፔ ሃኪዲ፡ ጫቆ ቃላስካ አላጋ ጊዲዲ፡ ሃይሳ አላማዛ ቦላ ሂደታይኔ ጸሐፊ ባይንዳ ካሴ እንገንጽ ዲዛ ዱሳ ዩሺ ቆፒቴ።

13 ሃኢ ቃሴ እንገንጽ ካሴ ሃሆን ዲዛይቲ ዬሱስ ከርሰቶሳን ጊዲዲ ኢዛ ሱላ ባጋራ ሸቂዳታ።

14 ናምኣታ ኢሲ ቦላ ጋሊዲ ጊደን ሻኪ ኦሺዛ ሚሻ ላሊዳ ኦ ሳሮይ ኢዛ።

15 ዋጋ፡ ዋጋ አዛዞራ ጋሊ ኢሲፊ ባ አሾን ሻሪዴስ፤ ኢዚ ሄሳ ኦሊዳ ጋሶይካ ኢዛስ ዋና ቆፋይ ናምኣታፔ ኢሲ ኦራላ አስ ባ ባጋራ ማጴዲ ሳሮቴል ኤሃናሳ።

16 ኢዚ ማስቃሌ ቦላ ሃይቂዲ ሞርኬቴል ዲጊዴስ፤ ናምኣታካ ኢሲ አሾ ሂስቲዲ ጸሐፊ ማቃዩንሊዴስ።

17 ኢዚ ዬዲ እንገንጽ ሃኪ ዲዛይታሲኔ ማታን ዲዛይታስ ጋሊ ሳሮቴል ሳባኪዴስ።

18 ኦ ወሪካ ኢዛ ባጋራ ኢሲ አያናን አዋ አኙ ሺቃና።

19 ሄሳ ገሻስ እንገንጽ አማኒዛይታራ ኢሲፊ ኢሲ ዴሬ አሳኔ ጸሐፊ ሶ አሳ አቲን ሃይሳፊ ጉዬ ቤቲታኔ አማላታ ጊዴኬታ።

20 እንገንጽ ሃዋሬታኔ ናቤታ ዮቻን ኬጾቲዳታ፤ ኬላስ ወርሴላ ኩሻይ ዬሱስ ከርሰቶሳ።

21 ኬላዚ ወሪካ ኢሲፊ ኦይኬቲዲ ጎዳስ ዲማ ኬላ ጊዳናስ ዲጮስ።

22 እንገንጽ ጸሐፊ ባ አያናን ዳናስ ኢዛስ ዱሳሶ ጊዳና ማላ ኢሲፊ ኬጾቲሼ ዳታ።

3

አይዛቤታስ ሃዋሪ ጊዲዳ ጳውሎስ

1 ሄሳ ጋሶን ታ ጳውሎሲ ኢንቴስ አማኖንታይታ ጊሻስ ዬሱስ ከርስቶሲ ቃቺዳዴ ጊዲዲስ።

2 ታ ኢንቴና ጎኣና ማላ ጸሲ ኪያቴላን ታስ ኦሶስ ኤጻ ኢሚዳይሳ ኢንቴ ቱማፔ ሲዪዴታ።

3 ሃይሳፌ ካሴ ታ ኢንቴስ ቃንላራ ጸፊዳ ማላ ታስ ቆንጨን ታ ኤራናስ ዳንዳይዳ ጸራይ ሃይሳ።

4 ሄሳ ጊሻስ ኢንቴ ሄሳ ናባቢሼ ከርስቶሳ ጸራ ታ አይ ማላ ኤሪዳኮ ኢንቴካ ኤራናስ ዳንዳይታ።

5 ሄ ጸራይካ ሃኢ አማኒዛ ሃዋሪታሲኔ ናቤታስ ቆንጨዳ ማላ ካሴ ቤኒ አጁዳ ዋዴ ዲዛ አሳታስካ ቆንጨቤና።

6 ሄሲ ሄ ጸራይ አይዛቤቱ ሚሺራቾ ቃላ ባጋራ ኢስራኤሌ ናይታራ ኢሲፌ ላቲዛይታ፤ ኢሲፌ ኢሳዴ አሳቴላ ማላ ጊዲዲ ዬሱስ ከርስቶሳ ባጋራ ቤቲዳ ሂዶታ ኢሲፌ ጊሼቲ ላቲዛይታ ጊዲናሳ።

7 ታኒካ ኢዛ ዋልቃ ኦሶ ማላ ታስ ኢሜቲዳ ጸሳ ኪያቴላ አሞታ ማላ ሃይሳ ሚሺራቾ ቃላ ኦሳንቾ ጊዲዲስ።

8 ታ ቃሴ ሃንኮ አማኒዛ አሳፔ ላፋ ጊዲኮካ ኦኒካ ዛዋይ ባይንዳ ከርስቶሳ ዱሬቴላ አይዛቤታስ ሳባካና ማላ ጸሳ ኪያቴላን ሃይሲ ታስ ኢሜቲዴስ።

9 ሄሳሐካ ኡባ ሜጁዳ ጸሳን ቤኒ ዋዴ ቆቴቲ ዲዛ ጸሳስ ጸራ ቆፋይ ኣዛኮ ኡባስ ታ ቆንጨሳና ማላ ታስ ጸሳ ኪያቴላ ኢሜቲዴስ።

10 ኢዛ ቆፋይ ሃኢ ዋዴ ዋሳ ኬላ ባጋራ ዲማ ዲማ ሜጁይ ዲዛ ጸሳ ሂላቴላ ሳሎን ዲዛ ሃላቃታሲኔ ጎዳታስ ኤሬታና ማላ ሃኒዴስ።

11 ጸሲ ኦ ጎዳ ዬሱስ ከርስቶሳ ባጋራ ሃይሳ ፖሊዳይ ባ ሜርና ቆፋ ማላ።

12 ኦኒ ኢዛይታ ጊዲዳ ጊሻሲኔ ኢዛን አማኒዳ ጊሻስ ጌሻቴላራኔ ሂርጋይ ባይንዳ ኦኒ ጸሳኮ ሺቃና ዳንዳዮስ።

13 ሄሳ ጊሻስ ኢንቴ ቦንቼታና ማላ ታኒ ኢንቴ ጊሻስ ታ ቦላ ጋኪዳ ዋዬዛን ኢንቴ ኡፋይስ ቃንጾንታ ማላ ታ ኢንቴና ሃዳራ ጋይስ።

ኤፌሶኔን አማኒዛ አሳስ ዋሴቲዳ ዋሳ

14 ሄሳ ጊሻስ ታኒ ጸሳ ሲንላን ጉልባታይስ።

15 ሳሎን ዲዛይኔ ቢታ ቦላ ዲዛ ኢዛሶ ኣሳይ ወሪካ ኢዚ ሱንሱን ሱሜስ።

16 ኢንቴ ጋርሳ ባጋራ ሚናና ማላ ኣያና ባጋራ ኢዛ ቦንቾ ዱሬቴሉ ኢንቴስ ኢሜታና ማላ ታ ዋሳይስ።

17 ሄሲካ ኪርሰቶሲ ኢንቴ ዋዚናን ኣማኖን ዳና ማላኔ ቃሴካ ኢንቴ ኢዛን ጸጺዲ ሲቆን ሚናና ማላ ዋሳይስ።

18 ኪርሰቶሳ ሲቆስ ኣሆቴላይ፥ ኣዱሳቴላይ፥ ቶቃቴላይ፥ ጨማቴሉ ኣይ ገናኮ ኢንቴ ኣማኒዛ ኡባ ኣሳራ ኢሲፌ ሻኪ ኤራና ማላ።

19 ኢንቴ ጸሳ ኩሜላራ ሻኪ ኤሪዲ ኢዛን ኩሜላ ጊዳና ማላ ኣሳ ኤራፔ ቦላ ጊዲዳ ኪርሰቶሳ ሲቆ ኢንቴ ኤራና ማላ ታ ዋሳይስ።

20 ሄሳ ገሻስ ኑ ጊዶን ኦሴዛ ባ ዋልቃ ገና ኑ ዋሲዛይሳፌኔ ዋይኮ ኑ ቆፒዛይሳፌ ኡባፌ ቦላራ ኬሂ ዳርሲ ኦላናስ ዳንዳይዛ ጸሳስ።

21 ዋሳ ኬላን ቃሴካ ዬሱስ ኪርሰቶሳ ባጋራ ዋዴ ኡባን ሜርናፔ ሜርና ጋካናስ ኢዛስ ቦንቾይ ጊዶ። ኣሚን።

4

ኪርሰቶሳ ባጋራ ቤቴዳ ኢሲፌቴላ

1 ሄሳ ገሻስ ጎዳ ሱንሳን ቃሼቴዳ ታኒ ኢንቴ ዴይጌቴዳ ዴይሳስ ቤሲዛ ዱስ ዳና ማላ ኢንቴና ዋሳይስ።

2 ሙሌካ ኣሽኬታኔ ሹጎታ ጊዲቴ፤ ኢሶይ ኢሳራ ሲቆን ዲቴኔ ኢሶይ ኢሳ ዳንዳይቴ።

3 ሳርቴላ ኢሚዛ ኣያና ኢሲፌቴላ ናጋናስ ሚኒቴ።

4 ኢንቴ ዴይጌቴዳ ጋላስ ኢሲ ሂዶታኮ ዴይጌቴዳ ማላ ኢሲ ኣሳቴሉኔ ኢሲ ኣያናይ ዴስ።

5 ኢሲ ጎዳይ፥ ኢሲ ኣማኖይኔ ኢሲ ጸንቃታይ ዴስ።

6 ኡባፌ ቦላራ ጊዲዳይ፥ ኡባ ቦላ ኦሴዛይ፥ ኡባሶን ዲዛይ፥ ኡባስ ኣዋ ጊዲዳ ኢሲ ጸሲ ዴስ።

7 ጊዲኮካ ኪርሰቶሲ ኢማና ጊ ቃቺዳ ማላ ኑስ ኢሳስ ኢሳስ ዲማ ዲማ ኢሞቴሉ ኢሜቴዴስ።

8 ሄሳ ገሻስ፡

«ኢዚ ፑዴ ኬዚዳ ዋዴ

ዲኦ ዲኢዴስ፤

ኣሳስ ኪያቴላ

ኢሞታ ኢሚዴስ»

ጌቲቲ ጌሻ ማጻፋን ጸፊቲደስ።

⁹ ሂስቲን፡ «ኢዚ ፑዴ ኬዚደስ» ጉሲ ቃሴካ ዱጌ ቢታ ጋርስ ዋዲደስ ጉስ ጊደንታ ኣጊኮ ሄሲ ኣይ ጉሴ?

¹⁰ ኢዚ ዱጌ ጋርሴ ዋዲደሲ ኩሜል ኣላሚ ሜዴቴል ኩማና ማላ ሳሎፔካ ቦላ ኬዚደይ ኢዛ።

¹¹ ኢሲ ኢሲ ኣሳቲ ሃዋሬታ፡ ባጋይቲ ናቤታ፡ ሃራቲ ሚሺራቾ ቃላ ሳባኬ፡ ባጋይቲ ቃሴ ሄሚዛይታኔ ታማርሲዛይታ ጊደና ማላ ኢዚ ኢሞታ ኢሚዴስ።

¹² ሄሲካ ኪርስቶሳ ኣሳቴል ጊዲዳ ዋሳ ኬልያ ኬጾታና ማላ ኣማኒዛይታ ኣማኖ ኦሶስ ጊጊሳናሳ።

¹³ ሄሲካ ሃናናይ ኑ ወሪካ ጸሳ ና ኣማኖኒኔ ኢዛ ኤሮን ቤቲዛ ኢሲፊቴላኮ ጋኪዲ ኩሜላ ኣስ ጊደናስ ኪርስቶሳን ኑኒ ኪርስቶሳኦ ኩሜሊኔ ፖሎ ጊደና ማላሳ።

¹⁴ ሄሳ ጊሻስ ኣባ ቦላ ዴንዲዛ ጎቴ ጫርኮይ ያኔ ሃ ሾጩቹዛ ማላ ዲማ ዲማ ቲሚርቲ ጫርኮን ኣሳ ጌኔኒኔ ባሌሶን ኣኔ ኑኒ ያኔ ሃ ጳንቄቲሼ ቄሪ ጉላ ናይታ ማላ ሃኖኮ።

¹⁵ ሄሳሶ ሃኖ ኣጊዲ ቱማ ሲቆን ሃሳይሼ ሁኤ ጊዲደይሳኮ ሃኒዛዛን ኡባን ኣኔ ዲጮስ፤ ሄ ሁኤዚካ ኪርስቶሳ።

¹⁶ ኢዛ ጋሶን ኣሳቴል ወሪ ጸጸን ኦይኬቲዲ ኢሲ ኢሲ ኣሳቴል ባ ኦሶ ኦሊሼ ወሪካ ሲቆን ዲጮሲኔ ባናካ ሚንፎስ።

ፖኦ ናይታ ማላ ዲስ

¹⁷ ኣይዛቤታ ማላ ጮ ሜላ ቆፋን ሜላ ሲሜሬታናስ ኢንቴስ ቤሴና ጋዳ ታ ኢንቴና ዙራይስ።

¹⁸ ኢስታ ዋዚናይ ሙሚዳ ጊሻሲኔ ዩሺ ቆፖንታ ጊሻስ ኢስታ ዋዚና ኣይፌይ ቆቂደስ፤ ኢስቲ ጸሳ ዴኦፔ ሻኬቲዳ።

¹⁹ ኢስታፊ ዩላቴል ጳይዳ ጊሻስ ባ ኮዩዳ ማላ ባና ካልሶንታ ኣሞኒኔ ቱናቴላን ደናስ ዋጋይ ባይንዳ ኢታ ኦሶስ ባና ኣሊ ኢሚዳ።

²⁰ ኢንቴ ቃሴ ኪርስቶሳ ሄሳ ማላን ኤሪቤኬታ።

²¹ ኤ ቱሙካ ኢንቴ ኢዛ ጊሻስ ሲዩዴታኔ ዩሱሳን ዲዛ ቱማ ኢዛፔ ታማርዴታ።

²² ኢንቴ ካሴ ዲዛ ዲሳይ ባሌሊዛ ኣሞን ቂታቲዳ ጊሻስ ካሴ ጩጋ ኣሳቴል ኢንቴፊ ቃሪ ዩጋና ማላ ታማርዴታ።

²³ ቃሴካ ኢንቴ ቆፋይ ኣያናን ኦራጸ።

24 ቱሙ ደሎቴላኒኔ ገሻቴላን ጸሰ ሚሳታና ሜዴቲዳ ኦራላ አሳቴላ ማይኢቱ።

25 ኑ ዉሪካ ኢሲ አሾ ጊዲዳ ገሻሰ ዋርዶቴላ ዲጊዲ ኩኒ ኑ ጋርሳን ኢሶይ ኢሳራ ኣኔ ቱማ ሃሳዮሰ።

26 ሃንቁቲቲ ሺን ናጋራ አላፍቴ፤ ኢንቲ ሃንቆን ዲሺን ኣርሼይ ዉሎፎ።

27 ጸላኤሰ ሶሆ አሞፍቴ።

28 ካሴ ካይሶቲዛይይ ሃይሳፌ ጉዬ ካይሶቶፓ፤ ጊዶ ኣቲን ሜቶቲቲዲ ኢዛ ዋሲዛይታሰ አሚዛ ሚሺ ኢዛ ኩሼን ዳና ማላ ሎኦ ሚሽ ባ ኩሼራ ኦላ ዳማናሰ ዳቡሮ።

29 ኮሺዛ ማላ ሃንኮ ሲዪዛይታ ጎኢዛዚኔ ማዲዛ ቃላፔ ኣቲን ጎኣይ ባይንዳ ቃላይ ኢንቲ ዶናፔ ኬዞፖ።

30 ኢንቲ ኣታና ጋላሳሰ ኣታሜቲዳ ጸሳ ደሎ ኣያና ሚሺሶፒቲ።

31 ጫሞ ዮኦ ኡባ ሃንቆ፣ ዪሎ፣ ኦሽ፣ ጫሼ፣ ቃሴካ ሃንኮ ሃራ ኢታቴላ ኡባ ኢንቲፌ ዲጊቲ።

32 ኢንቲና ጸሲ ኪርሰቶሳ ባጋራ ኣቶ ጊዳ ማላ ኢንቲካ ኢንቲ ጋርሳን ኣቶ ኣቶ ጌቲቲቴ፤ ኢሶይ ኢሳራ ኪያታኔ ኢሶይ ኢሳሰ ቃዴቲዛይታ ጊዲቲ።

5

1 ሄሳ ገሻሰ ኢንቲ ዶሴቲዛ ናይታ ማላ ጸሰ ሚሳቲቲ።

2 ኪርሰቶሲ ኦና ሲቂዳ ማላ ቃሴካ ኑ ገሻሰ ባና ሳዊዛ ያርሾ ኦላ ጸሳሰ አሚዳ ማላ ኢንቲካ ሲቆን ሲሜሬቲቲ።

3 ላይማይ ዋይኮ ቱናቴላ ዋይኮ ኡዜቴላ ሙሌካ ኢንቲ ጊዶን ቤቶይ ኣቲን ዚገርሲካ ሲዬቶፎ፤ ሄሳ ማላይ ጌሻ ጸሳ ኣሳሰ ቤሴና።

4 ኢንቲ ጋላታ ጋላቲዛይታ ጊዲቲ ኣቲን ኣሴ ዬላቺዛ ላፋ ሃሳያይ፣ ጮ ኤያቴላ ዮኦይ ኢንቲሰ ቤሶንታ ገሻሰ ሄሳ ማላይ ኢንቲ ጋርሳን ዶፖ።

5 ቃሴካ ኢንቲ ላይማቲዛይታሰ ዋይኮ ቱናታሰ ዋይኮ ኡዜቴዛይታሲኔ ኤቃሰ ጎይኒዛይታሰ ኪርሰቶሳ ካዋቴላኒኔ ጸሳ ካዋቴላን ኢሰታሰ ላታሶይ ባይንዳይሳ ኢንቲ ኤሪቴ።

6 ኢንቲና ኦኒካ ዋርዶ ሃሳያን ባሌላፎ፤ ጋሶይካ ጸሳ ሃንቆይ ኢዛሰ ኣዛዜቶንታ ናይታ ሶላ ያናይ ሃይታንታ ማላና።

7 ሄሳ ገሻሰ ሄሳንታ ማላራ ዙፔቶፒቲ።

8 ካሴ ኢንቲ ቋማ ሺን ጎዳን ሃኢ ኢንቲ ፖኦ፤ ኢንቲ ፖኦ ናይታ ማላ ዲቲ።

9 ፖኦስ አይፌይ ሎኤቴላን፥ ጸሎቴላኒኔ ቱማቴላን ኡባን ዳስ።

10 ሃሳፉካ ጎዳ ኡፋይሲዛ ሚሽ ኮዪቲ።

11 አይፌይ ባይንዳ ቋማ ኦሶራ ኢንቴስ አይኮ ጋጎቴላ ዶፖ፤ ሃሳፌ ኢታ ኦሶ ቆንጨኹ ከሲቲ።

12 ቋማን ዲዛ አሳቲ ጌማን አሊዛ ሚሻ ጊሻስ ሃሳያይካ ዬላቼስ።

13 ፖኦይ ፖኢዳዚ ዉሪ ቆንጨን ቤቲስ።

14 ጋሶይካ ኡባ ቤሲዛይ ፖኦ፤ ሃሳ ጊሻስ።

«ኔና፥ ቋስኪዛይሶ ቤጋ!

ሃይቆፔ ዴንዳ!

ኪርስቶሲ ኔስ ፖኢሳና» ጌቲቲዳስ።

15 ሃሳ ጊሻስ ኤራቴላ ባይንዳይታ ማላ ጊዶንታ ኢንቲ ዋኒዲ ኤራታ ማላ ዳናኮ ናጌቲቲ።

16 ሃይሲ ዋዴዚ ኢታ ጊዲዳ ጊሻስ ሃሳ ሎኤላ ኤሪቲ።

17 ሃሳ ጊሻስ ኤያታ ጊዶፒቲ፤ ጎዳ ሸኔይ አዛኮ ዩሺ ቆፒቲ።

18 አያናይ ኩሚዳይታ ጊዲቲ አቲን ማሶሲዛ ኡሻን ማሶቶፍቲ፤ ሃሲ ጮ ሜላ ሚሻ ላሌላ።

19 አያና ዬላን ጋላታራ ጋላ ዬዲሼ ኢንቲ ጊዶን ኢሶይ ኢሳራ ሃሳዬቲቲ፤ ኢንቲ ሳባኒኔ ዬላን ኩሜላ ዋዚናፔ ጎዳ ጋላቲቲ።

20 ሃሳን ጸሳ አዋ፥ ጎዳ ዬሶስ ኪርስቶሳ ሱጎላ ኡባ ሚሻስ ኡባ ዋዴ ጋላቲቲ።

ማሾኔ አዚና

21 ኢንቲ ኪርስቶሳ ቦንሾስ ጊዲ ያሻራ ኢሶይ ኢሳስ አዛዜቲቲ።

22 ማሾቶ ኢንቲ ጎዳስ ሃራቲዛ ማላ ኢንቲ አዚናታስ ሃራቲቲ።

23 ኪርስቶሲ ባ አሾ ጊዲዳ ዋሳ ከላይስ ሁኤ ጊዲዳ ማላ አዚናይካ ባ ማሾይስ ሁኤ።

24 ሃሳ ጊሻስ ዋሳ ከሊያ ኪርስቶሳስ አዛዜቲዛ ማላ ማሾቲካ ባ አዚናታስ አይ ሃኖንካ አዛዜታናስ ቤሴስ።

25 አዚናቶ! ኪርስቶሲ ዋሳ ከላዮ ሲቂዳ ማላኔ ባና ኢዚ ጊሻስ አሊ ኢሚዳ ማላ ኢንቲካ ኢንቲ ማሾታ ሲቂቲ።

26 ባ ቃላ ባጋራ ሃላን ሜጨ ጌሺ ዲማሲዳስ።

27 ሃሳብ ቂታይ ዋይኮ አይፌሶ ጸርጾቱል ዋይኮ ኢሲ ኢታይ ኢዚ ቦላ ቤቶንታ ጌሺኔ ባላይ ኢዚ ቦላ ባይንዳር ቦንቾ ዋሳ ኬል ሂሰቲዲ ሸሻናሳ።

28 አዚናቲካ ሃሳብ ባ ማቼታ ባ አሾ ማላ ሲቃናስ ቤሴስ፤ ባ ማቾ ሲቁዛዴይ ባና ሲቁስ።

29 ባርካ ባና ኢጲዛዴይ ኦኒካ ዴና፤ ባ አሾስ ሜሲኔ ባና ናጌስ፤ ኪርሰቶሲካ ዋሳ ኬላስ ሂኒሶ ኦሊዴስ።

30 ኦኒ ኪርሰቶሳ አሳቴላ።

31 ሃሳ ጊሻስ፡ «ኣሲ አዮኔ አዋ አጊዲ ባ ማቼይራ ኢሲኖ ጊዴስ፤ ናምኣይካ ኢሲ አሾ ጊዴቴስ» ጌቴቴ ጌሻ ማጻፋን ጸፊቲዴስ።

32 ሃይሲ ዳር ጹራ ዮኦ፤ ታኒካ ሃይሳ ኪርሰቶሳ ጊሻሲኔ ዋሳ ኬላ ጊሻስ ዮታይስ።

33 ጊዲኮካ ኢንቴፌ ኢሲ ኢሳዴይ ባ ማቾ ባና ሲቁዛ ማላ ሲቆ፤ ማቻካ ባ አዚና ቦንቾ።

6

ዩሊዳይታኔ ናይታ

1 ናይቶ! ኢንቴ ኢንቴና ዩሊዳይታስ ጎዳን አዛዜቲቴ፤ ሄሲ ኢንቴስ ቤሴስ።

2 «ኔ አዋኔ ኔ አዮ ቦንቻ» ጊዛ አዛዘ ጊዶን ዲዛ ሂዶታይ ኮይር አዛዘ።

3 ኔ ሃሳብ ኦሊኮ ኔስ ሎኣናኔ ኔስ ላይላይ ቢታ ቦላ አዲቃና።

4 ዩሊዳይቶ! ኢንቴካ ኢንቴ ናይታ ሃንቄሶፍቴ፤ ጊዶ አቲን ኢንቴ ናይታ ጎዳ ዘሬኒኔ ሴራን ዲቺቴ።

ኦሲሲዛይታኔ ኦሊዛይታ

5 ኦሳንቻቶ! ኢንቴ ኪርሰቶሳስ አዛዜቲዛ ማላ ቢታ ቦላ ኢንቴና ኦሲሲዛይታስ ያሻቴላኒኔ ቦንቾን ሱሬ ዋዚናፔ አዛዜቲቴ።

6 ጮ አሳ አይፌን ቤታና ማላኔ ኦሲሲዛይታፔ ዶና አንጆ ኤካናስ ጊዶንታ ኢንቴ ኪርሰቶሳ አይሌታ ማላ ጸሳ ሼኔ ኩሜላ ዋዚናፔ ፖላና ማላ ዋዚናፔ አዛዜቲቴ።

7 አሳስ ኦሊዛ ማላ ጊዶንታ ጎዳስ ኦሊዛ ማላ ኢንቴ ኩሜላ ዋዚናፔ ኦሊቴ።

8 ጋሶይካ አይሌ ጊዲን ወይኮ ጎዳ ጊዲን ባ ኦሊዛ ሎኦ ኦሶስ ኡባስ ወይቶ ኤካናይሳ እንቴ ኤሬታ።

9 እንቴኖ ጎዳቶ! እንቴካ እንቴ ኦሲሲዛይታስ ሄሳዎ ኦሊቴ፤ ኢስታሲኔ እንቴስ ጎዳ ጊዲዳይ ቦላ ሳሎን ዲዛይሳ፤ ኢዚካ አይፊሶ ጸሊ ኣስ ማዶንታይሳካ እንቴካ ኤሪዛ ጊሻስ ኦሳንቻታ ባቢሶ አጊዲ ሎኦ ኦሊቴ።

ጸሳፊ ቤቲዛ ኦላ ሚሽ

10 ሃራ ባጋራ ሚኖ ጎዳኒኔ ኢዛ ጊታ ዋልቃን ሚኒቴ።

11 ዳቡሎሳ ጌኔ ኦሶ እንቴ ኤቄታናስ ዳንዳያና ማላ ጸሳ ኦላ ማይኦታ ማይኢቴ።

12 ጋሶይካ ኦ ኦሌታናይ አሾራኔ ሱፋራ ጊዶንታ ሃይሳ ጳማ አላሜዛ ሃሪዛ ጎዳታራ፥ ዋልቃማታራኔ ሳሎ ቦላ ዲዛ ቱና ኣያና ኦላንቻታራ ኦሌቶስ።

13 ኢታ ጋላሳይ ጋኪሺን እንቴ ዋርኬ ዋልቃራ ኤቄታናስ ዳንዳያና ማላ ጸሳ ኦላ ማይኦታ ኩሜል ማይኢቴ፤ እንቴ ኡባካ ፖሊዳፔ ጉዬ ሚኒ ኤቃናስ ዳንዳይታ።

14 ሄሳ ጊሻስ እንቴ ጸሳን ቱማ ዚናሬ ማላ ዳንጨቲዲ ጸሎቴላ ጸሩሬታ ማላ ቲራን ማይኢዲ፥ *

15 ሳርቴላ ሚሺራቾ ቃላ ቶሆን ጫማ ማላ ኣሊዲ ጊጌቲ ኤቄቴ።

16 ሄይታንታፊካ ቦላራ ታማ ማላ ፖፖልኡ ጊዛ ኢታ ኣያና ዋንዳፊታ እንቴ ኡባ ቶይሳና ዳንዳያና ማላ አማኖ ጎንዳሌ ማላ ዳንሊቴ።

17 አቶቴል ቢራታ ቆቤ ማላ ሁኤን ዋሊቴ፤ ኣያና ጊላ ማሻ ኦይኪቴ፤ ሄሲካ ጸሳ ቃላ።

18 ዋሳን ኣይ ሃኖንካ ኣያናን ዋሲቴ፤ ሄሳ ቆፒዲ ቤጊቴ፤ አማኒዛይታ ኡባ ጊሻስ ቃንጽንታ ዋሲቴ።

19 ታኒ ሚሺራቾ ቃላ ጵራ ኣሳስ ቆንጩሳናስ ዶና ዶይዛ ኡባ ዋዴ ያሺ ባይንዳ ታ ጸላቴላን ኖታናስ ቃላይ ታስ ኢሜታና ማላ ታስ ዋሲቴ።

20 ታኒ ሚሺራቾ ቃላ ጊሻስ ሳንሳላታን ቃሼታዳ ኪቴቲዳዴ ጊዲዳይ ሄሳሳ፤ ሄሳ ጊሻስ ታ ኖታናስ ቤሲዛይሳ ባቦንታ ኖታና ማላ ታስ ዋሲቴ።

6:9 ቆላ 4:1፤ ዛሬ 10:17፤ ቆላ 3:25 * 6:14 ጸሩሬ ጉሲ ቤኒ ዋዴ ኦላ አሳቲ ቲራን ማይኢዛ ኦላ ማይኦ። 6:14 ኢሳ 11:5፤ 59:17 6:15 ኢሳ 52:7

6:17 ኢሳ 59:17

ወርሴላ ሳሮካ

21 ታ ኣይ ማላ ዲዛኮኔ ኣይ ኦሊዛኮ ኢንቴ ኤራና ማላ ደሴቲዳ ታ ኢሻይ ጎዳሰ ኣማኔቲዳ ኦሳንቻይ ቲቂቆሲ ኢንቴሰ ሃኒዳይሳ ወርሴካ ኢንቴሰ ዮታና።

22 ኢንቴ ኑ ሃኖቴሰ ኤራና ማላኔ ኢንቴ ዎዚና ኢዚ ሚንፊላና ማላ ታ ኢዛ ኢንቴኮ ዩዳዲሰ።

23 ኣዋ ጸሳፌ፥ ጎዳ ዩሱሰ ኪርሰቶሳፔ ሳሮቴሊኔ ሲቆይ ኣማኖራ ኢንቴሰ ታ ኢሻታሰ ጊዶ።

24 ጎዳ ዩሱሰ ኪርሰቶሳ ፓጩይ ባይንዳ ሲቂዛ ኡባሰ ሳሮቴሊ ጊዶ። ኣሚን።

ጌሻ ማጸፋ

Gamo: ጌሻ ማጸፋ Bible of Ethiopia, Ethiopic script

copyright © 2024 The Word for the World International

Language: Gamotso (Gamo)

Contributor: The Word for the World Northern Africa

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-03

PDF generated using Haiola and XeLaTeX on 2 May 2025 from source files dated 3 May 2025

d0ee6825-f93e-584e-8c8f-567d8d068e4b